




六集第六種

史漢駢枝

史漢駢枝

寶應成蓉鏡芙卿著

史記五帝本紀登丸山集解徐廣曰丸一作凡駟按地理志曰
丸山在郎邪朱虛縣正義丸音桓括地志云丸山卽丹山在
青州臨朐縣界朱虛故縣西北二十里丹水出焉丸音紈守
節按地志唯有凡山蓋凡山丸山是一山耳諸處字誤或凡
或丸也漢書郊祀志云禪丸山顏師古云在朱虛亦與括地
志相合明丸山是也今按水經巨洋水篇巨洋水出朱虛縣
泰山北過其縣西注巨洋水北流逕朱虛縣故城西漢惠帝
二年封齊悼惠王子劉章爲侯國地理風俗記曰丹山在西
南丹水所出東入海丹水由朱虛邱阜矣城東北二十里有

丹山世謂之凡山縣在西南丹凡字相類音從字變也正義
據括地志定作丸是也唯云地志唯有凡山此則唐本漢志
之誤集解引地理志稱丸山知裴氏所見本作丸可據以正
唐以後諸本之譌徐堅初學記九引史記作桓山丸桓音同
據此知唐本史記作丸不作凡正與正義合酈善長謂丹凡
字相類音從字變古今音皆丹丸相近其讀丹近凡者偏隅
之俗音耳不足取證酈氏又據風俗記謂丹水出朱虛邱阜
括地志朱虛故城在臨朐縣東六十里以今輿地按之丹水
所出山在朱虛故城西北則風俗記丹山在西南南當爲北
字之譌丹水東北流不得轉向南出朱虛矣據正義引括地
志謂丸山在朱虛故縣西北二十里則酈注城東北二十里

有丹山之說亦誤路史後紀注引十道志沂山縣之沂山也
又云或東泰山卽沂山沂山今之雕崖山水經謂之艾山東
泰山水經亦稱泰山酈注謂之東小泰山皆於丸山無涉其
說竝非

西至於空桐登雞頭集解空桐應劭曰山名韋昭曰在隴頭索
隱雞頭山名也後漢王孟塞雞頭道在隴西一曰崆峒山之
別名正義括地志云空桐山在肅州祿福縣東南抱朴子內
篇云黃帝西見中黃子受九品之方過空桐從廣成子受自
然之經卽此山括地志又云笄頭山一名崆峒山在原州平
高縣西百里禹貢涇水所出輿地志云或卽雞頭山也酈元
云蓋大隴山異名也莊子云廣成子學道崆峒山黃帝問道

於廣成子蓋在此按二處崆峒皆云黃帝登之未詳孰是今按平高故縣卽今甘肅固原州治漢書地理志安定郡涇陽開頭山在西禹貢涇水所出開頭卽雞頭亦名薄洛山淮南子墜形訓涇出薄洛之山許慎曰薄洛山一名岍頭山續漢書郡國志安定郡烏支縣有薄落谷音或轉爲牽屯十六國春秋西秦錄乞伏結權自高平遷於牽屯是也今俗名曰箕裘湫亦以聲轉而譌括地志謂筭頭在平高西百里西當爲南字之誤也鄭氏云大隴山之異名卽涇水注崇文總目稱水經已佚五卷此注亦在其中矣太平寰宇記於平高縣亦引之亦名高山寰宇記百泉縣涇水下引水經涇水出安定涇陽縣高山注云山海經曰高山涇水出焉亦稱涇谷元和

郡縣志涇水源出百泉縣西南涇谷祿福故縣卽今肅州治
在固原州西北遠甚括地志前說非也索隱一曰崆峒山之
別名考崆峒古祇作空桐當是隴西地名非山也史記於九
山岱宗雞頭熊湘竝繫以登而東至于海西至于空桐南至
于江空桐但與江海類列則其爲地名而非山可知韋昭曰
在隴右索隱前說云在隴西最合應劭及索隱後說竝非也
冊說崆峒山在大統之西又西十里乃笄頭山也亦似是而
實非至莊子稱廣成子學道崆峒山崆峒本作空同其稱空
同山蓋以其山在空同因以地名名其山猶涇水出薄落谷
因曰其水爲薄落水也而司馬紹統復以北戴斗極之空桐
當之不知爾雅之空桐在極北與黃帝所至非一地不可混

而同之也

登熊湘集解封禪書曰南伐至于召陵登熊山

山上各本無耳字當據封禪書

校補

地理志曰湘山在長沙益陽縣正義括地志云熊耳山在

商州上洛西齊桓公登之以望江漢也湘山一名鴈山在岳
州巴陵縣南今案春秋僖公四年盟于召陵杜預注潁川縣
也晉召陵故縣在今河南鄆城縣東三十五里今尚有召陵
岡是其遺址封禪書南伐至召陵登熊耳山以望江漢索隱
荊州記益陽東北有熊耳山齊桓公太史公並登之或云弘
農熊耳井也考封禪書之熊耳山卽漢志所稱弘農郡盧氏
熊耳山在東者是今河南宜陽縣西接永甯縣界有熊耳山
後漢建武三年赤眉積兵宜陽城西與熊耳山齊是其地東

南距召陵岡僅數百里故桓公至召陵得登之以望江漢楚
世家齊桓公以兵侵楚至涇山卽左傳所謂次于涇是正義
引括地志云涇山在鄭州西南一百一十里此山今在新鄭
縣西南與大騁山並峙適當鄆城召陵西北宜陽熊耳東南
亦其證矣若黃帝所登熊山亦名熊耳山在今湖南益陽縣
西桓公伐楚當楚文王之十六年是時楚都郢在今湖北荊
州府治北桓公伐楚但至楚北境卽盟而還焉得南踰楚都
三四百里以登益陽之熊耳乎索隱以益陽熊耳釋桓公所
登之熊耳而謂弘農熊耳爲非抑近疏矣黃帝所登熊耳與
湘山相近自當以在益陽者爲是而集解復引封禪書桓公
所登者釋之亦誤至正義引括地志云在商州上洛西齊桓

公登之以望江漢此熊耳則漢志所稱弘農上雒熊耳獲輿
山在東北者也今在陝西商州西南在宜陽熊耳西南數百
里外去召陵陘山太遠非桓公所登明矣則括地志亦非也
湘山漢志謂在益陽北正義則以編山當之考秦始皇本紀
浮江至湘山祠逢大風幾不得渡上問博士曰湘君何神博
士對曰聞之堯女舜之妻而葬此於是始皇大怒使刑徒三
千人皆伐湘山樹赭其山水經湘水注洞庭湖中有君山編
編同山湘君之所遊處故曰君山昔秦始皇遭風于此而問其
故博士曰湘君出入則多風秦王乃赭其山東北對編山兩
山相次去數十里據此則湘山編山本屬二山湘山自是君
山之別名正義合湘山編山而一之殆非也

江水正義括地志云安陽故城在豫州新息縣西南八十里應劭曰古江國也地理志亦云安陽古江國也今案安陽兩漢志竝屬汝南郡故城在今河南汝甯府正陽縣西南新息故縣卽今河南光州息縣治正陽息縣竝在故安陽東北江國路史國名紀以爲少昊後嬴姓而黃帝後姬姓國別有江水正義以少昊後之江國釋江水疏矣而路史復于江水下注云元囂國若之下流泝水也今蜀州蜀州今爲四川成都府崇慶州地若水今之鴉礮江其下流至西昌縣西號曰打沖河又東南至會理州西與金沙江合流卽水經所謂南過越雋邛都縣西直南至會無縣淹水東南流注之者也皆不經故蜀州境路史旣謂古江水國在蜀州而又以爲若之下流

亦失之

若水索隱江水若水皆在蜀卽所封國也水經曰水出旄牛徼外東南至故關爲若水南過邛都又東北至朱提縣爲盧江水是蜀有二水也今案酈元若水注若水沿流閒關蜀土黃帝長子昌意

據史記其一曰元囂其二曰昌意則長子誤

德劣不足紹大位降居

斯水爲諸侯焉娶蜀山氏女生顓頊于若水之野若水今爲鴉礪江據下文稱若水東南流鮮水注之準之地望鴉礪江自霍耳章谷土司以北皆東南流以南則否然則古江水國在霍耳章谷土司西北可知羅長源謂江水國在蜀州以鳥道法計之西北距霍耳章谷土司僅四百餘里則江水正指岷江而小司馬引水經而云蜀有此二水其意蓋以盧江爲

江水不知瀘

盧同

江在朱提今爲敘州府宜賓縣西南地在故

蜀州南數百里外西北距故若水國千有餘里相去太遠不可從

江淮荊州正義淮讀曰匯音胡罪反今彭蠡湖也本屬荊州尚書云南入于江東匯澤爲彭蠡是也今案東匯澤爲彭蠡不得稱彭蠡爲匯淮當如字讀江淮荊州謂江淮之間古荊州之地不東涉揚州域也

冀州正義蒲州河東縣本屬冀州宋永初山川記云蒲坂城中有舜廟城外有舜宅及二妃壇括地志云媯州有媯水源出城中耆舊傳云卽舜釐二女於媯汭之所外城中有舜井城北有厯山山上有舜廟夫詳按媯州亦冀州城是也今按自

史公謂舜爲冀州人張守節遂以河東當之不知孟子明云
舜東夷之人又云地之相去千有餘里河東於中國偏西與
東夷之說不合且河東西距岐周僅數百里亦與千有餘里
之說不合史公稱舜耕厯山漁雷澤陶河濱作什器於壽邱
就時於負夏厯山水經瓠子河注雷漢西南十許里有小山
謂之厯山澤東北有陶墟郭緣生言舜耕陶所在郡國志濟
陰郡成陽劉昭注引帝王世紀舜耕厯山漁雷澤濟陰有厯
山雷澤地理志謂在濟陰郡成陽西北成陽故縣在今山東
曹州府治東北河濱大河未徙時流逕大伾東卽其處壽邱
或卽陶邱負夏鄭康成以爲衛地皆在曹濮閒西距岐周一
千餘里正與孟子合無可疑矣或以禹貢冀州三面距河雷

夏澤在兗州域與史公冀州之說不相應竊謂唐以前九州疆域不必盡同禹貢雖指云蓋自羲農以迄帝堯竝爲九州但其州名與疆域容有不同故黃帝顓頊亦稱建置日知錄云夏商以後沿上世九州之名各就其疆理所及而分之故每代小有不同周禮量人掌建國之法以分國爲九州曰分則不循於其舊可知矣然則唐堯時冀州容有河外地與楚世家文王二十六年滅英正義英國在淮南蓋蓼國也不知何時改名今案正義非也左傳文公五年楚公子變滅蓼魯文公五年於楚爲穆王之四年世家下云穆王四年滅六蓼六蓼皋陶之後正與左傳合

項羽本紀烏江亭長檣船待錢氏曉徵攷異云檣當從鄒氏本